

**ULLUUNERANI PAAQQINNITTARFIIT PILERSINNEQARTARNERANNUT,  
ILUSILERSORNEQARTARNERANNUT, SIULERSORNERANNUT  
INGERLANNERANNULLU  
ILITSERSUUT**

Najukkani assigiinngitsuni pisariaqartitsinerit tunngavigalugit meeqqanut ukioqanngitsuniit 13-inik ukiulinnut ulluunerani paaqqinnittarfiit pilersinneqartarnerannut ilusilersorneqartarnerannullu najoqqutassiat makkua atorneqassapput.

**IMMIKKOORTOQ 1**

Ulluunerani paaqqinnittarfiit **nakkutilliisunik misissuisullit**, tassalu imaappoq sulisut meeqqat takkuttarnerisa nakkutiginnissaannut, nalunaarutigineqanngitsunik takkutinngitsoortoqartillugu angajoqqaanik ilisimatitsinissamut kiisalu meeqqat paaqqinniffimmiitillugit nakkutigineqarnissaannut pisussaatitaallutik.

Paaqqinnittarfiit makkua akuersissutigineqarsinnaapput

1. Ulluunerani paaqqinnittarfiit 0-2-nik ukiulinnut (meeraaqqeriviit)
2. Ulluunerani paaqqinnittarfiit 0-6-inik ukiulinnut (assigiinngitsunik ukiullit ataatsimoortillugit)
3. Ulluunerani paaqqinnittarfiit 0-13-inik ukiulinnut (assigiinngitsunik ukiullit ataatsimoortillugit)
4. Ulluunerani paaqqinnittarfiit 3-6-inik ukiulinnut (meeqqeriviit)
5. Ulluunerani paaqqinnittarfiit 7-13-inik ukiulinnut (fritidshjemmit)

Najoqqutassiat ulluunerani paaqqinnittarfinnut tamanut atuupput piginnittoq aammalu ingerlatsinermi pissutsit apeqquataatinnagit. Kommunalbestyrelsen § 25 naapertorlugu najoqqutassiat maleruarneqarnersut nakkutigissavai.

Imm. 2  
**Assigiissaarinerit**

Meeqqanut paaqqinnittarfinni annertussuseq annerpaaq: Inissamut ataatsimut 6 m<sup>2</sup>.

Ulluunerani paaqqinnittarfinni init sammisaqartitsiviit annertussusissaat: Inissamut ataatsimut 4 m<sup>2</sup>. (Inini suliaqarfinni isumagineqarput: Init ukioqatigiiaanun naatsorsuussat, init ataatsimoortarfiit, init sammisaqartitsiviit/init soqutigisanik aallussiviit).

Inini ukioqatigiikkuutaanut naatsorsuussani minnerpaamik annertussusissaq: Inissamut ataatsimut 2 m<sup>2</sup>.

Igaffiit: 12 m<sup>2</sup>. Igaffimmi nerriviit akileriit ungasissusissaat 1,8 m.

Isertarfik pingaarneq torsuusaqassaaq.

Meeqqat atisaajartarfiini meeqqat tamarmik immikkut atisaajartarfeqassapput.

Atisaajartarfiup qanitaani panersiiveqarnissaq.

Inissat 40-kkuutaarlugit innarluutilinnut anartarfik ataaseq.

Anartarfiit ininit sammisaqartitsivinniit ininillu soqutigisanik aallussivinniit ingerlaannaq iserfigineqarsinnaasariaqanngillat.

Inissat qulikkuutaarlugit meeqqat anartarfiat ataaseq.

Anartarfimmi/anartarfiup eqqaani errortuiveqarnissaq (qorlortitsivimmik).

Paaqqinnittarfinni meeqqanik pingasut inorlugit ukiulinnik tiguisartuni ataatsimoortunut ataatsinut nerriviusaq nangilersuisarfik asaffittalik ataaseq.

Paaqqinnittarfinni meeqqanik arfinillit sinnerlugit ukiulinnik tiguisartuni anartarfiit immikkoortut matullit.

Ini nerisassaasivik (ataatsimoortunut ataatsinut 2 m<sup>2</sup>-it missaanni).

Eqqiaanermut atortunut assigisaannullu toqqorsivik parnaarneqarsinnaasoq.

Paaqqinnittarfik ataatsimoortunut tamanut toqqorsiveqartariaqarpoq (3 m<sup>2</sup> missaanni).

Init qasuersaartarfiit (oqorsakkat/kiassakkat) siniffissallit paaqqinnittarfinni meeqqanik arfinillit inorlugit ukiulinnik tiguisartut inissaasa amerlassusissaattut akuerineqarsimasut 1/3-iinut naaper-tuuttut. Init qasuersaartarfiit minnerpaamik 12 m<sup>2</sup>-iussapput.

Errorsisarfiit parnaarsinnaasariaqarput.

Nillataartitsiviit gerititsiviillu inaat pisariaqartinneqartutut annertutigisut.

Torsuusat 1,6 m-itut silitsigissapput.

Matut 0,9 m-itut silitsigissapput.

Init igalaaqanngitsut matui matuersaateqarani ammarsinnaasariaqarput.

Tummeqqat tummerartaat assigiinngisitaartunik akuttussuseqassanngillat, aammalu meeqqanut arfinillit inorlugit ukiulinnut paaqqinnittarfinni sapinngisamik pinaveersarneqassallutik.

Tummeqqat sinaakkutaat nalinginnaasumik tigummiviup saniatigut meeqqap angissusiatut (0,6 m) portutigisunik tigummiveqassapput.

Tummeqqat qummukartarfiit ammukartarfiillu isumannaallisakkat pingaartumik parnaarneqarsinnaasumik matullit.

Aneerasaartarfinni assigisaannilu ungaluusat 1,2 m-isut portussuseqarnissaat qulakkeerneqassaaq, aammalu imatut ilusiligaassallutik meeqqat qamiterutinut taakkualunniit akornannut qallorsinnaajunnaarlugit.

Igalaqarfii/igalaat natermiit 0,6 m-isut portussusilimmik inissinneqassapput.

Meeqqat qamutaannut, sikkilnut, qamutunut assigisaannullu init toqqorsiviit (ataatsimoortunut tamanut 6 m<sup>2</sup> missaanni).

Allaffiit sulisunullu inissat pisariaqartut pigineqassapput, tassunga ilanngullugit sulisunut pujortarfii (inini meeqqanit atorneqartartuni pujortartoqartariaqanngilaq aammalu inini ataatsimoorfiusartuni pisariaqarani).

Paaqqinnittarfik imatut aaqqissuunneqassaaq innarluutillit immikkut suliniuteqarfigineqanngikka-luarlutik tiguneqarsinnaasunnngorlugit.

Kikkunnilluunniit aqutigineqarsinnaasuminggaanniit paaqqinnittarfimmut isersinnaaneq sapinngi-samik innarluutilinnut ajornanngitsuusariaqarpoq.

Inissamut ataatsimut pinnguarterfik 10 m<sup>2</sup> missaanniittoq pineqarsinnaasariaqarpoq.

### Imm. 3 **Aqutsisut**

Paaqqinnittarfik ileqqoreqqusaqaassaaq kommunalbestyrelsimit akuersissutigineqartunik, ileqqo-reqqusallu makkua pillugit aalajangersakkanik imaqaassallutik:

- piginnittuunermut tunngasut,
- paaqqinnittarfimmi inissat amerlassusissaattut akuersissutigineqartut,
- ukioqatigiiaat sorliit tiguneqassanersut,
- ammasarfiit,
- siulersuisut inuttalersugaanerit qinerneqarnerallu,
- suleriaasissaq,
- oqartussaassutsimut tunngasut,
- nipangiussisussaataaneq.

Paaqqinnittarfik siunertatut anguniagaqassaaq kommunalbestyrelsimit atuutilersinneqartumik. Ul-luunerani paaqqinnittarfimmut tamanut pingaarnersutugit siunertatut anguniagaq tassaavoq:

Ulluunerani paaqqinnittarfiup angajoqqaat suleqatigalugit tamatigoortumik ineriartor-nissap siuarsarnissaa peqataaaffigissavaa, taamaalillutik meeqqat inuiaqatigiinni peqa-taalersinnaaniassammata.

Meeqqat ukiuminnut ineriartornerminnullu naapertuuttumik akisussaaffilerneqassap-put sunniuteqaqataatinneqarlutillu, meeqqap nammineerluni inuunerminut naalagaa-nissaa aammalu atuarfik, sulineq, politikki kulturikkullu inuuneq aqutigalugit inuia-qatigiinni timitalimmik peqataanissaa siunertaralugu. Ulluunerani paaqqinnittarfiup perorsaanermik suliamini najukkani assigiinngitsuni kulturikkut ileqqutoqqat aallaavi-gissavai.

Paaqqinnittarfiup pisortaata aalajangersakkat paaqqinnittarfiup ileqqoreqqusaani aalajangersarne-qartut naapertorlugit paaqqinnittarfiup suliatigut allaffissornikkullu ingerlannera akisussaaffigaa.

### Imm. 4 **Ingerlatsineq**

#### **Meeqqat amerlassusissaattut aalajangersarneqartut**

Meeqqat pingasunik ukioqalersimannngitsut – innarluutillit arfinilinnik ukioqalersimannngitsut – meeqqamut ataatsimut paaqqinnittarfimmi inissanik marlunnik pissarsisarput.

Meeqqat pingasunik ukioqalereersimasut – innarluutillit arfinilinnik ukioqalereersimasut – meeqqamat ataatsimut inissamik ataatsimik pissarsisarput.

Paaqqinnittarfiup meeqqat ukioqatigiikkuutaat amerlanerpaamik sisamat tigusinnaavai.

Meeqqat ukioqatigiiaat tamarmik amerlanerpaamik 24-nik inissaqarsinnaapput.

### **Sulisut amerlassusissaattut aalajangersarneqartut**

Paaqqinnittarfik pisortaqassaaq sivikinnerpaamik ukiuni pingasuni perorsaanermik ilinniarsimasunik.

Atorfiit amerlassusissaattut aalajangerneqartut ikinnerpaamik 50%-ii sulisuussapput perorsaanermik ilinniarsimasut (tassunga ilanngullugit meqqerisunut perorsaanunullu ikiortit).

Meeqqat ukioqatigiikkuutaat tamarmik immikkut sulisussaattut aalajangerneqartut minnerpaamik tassaassapput:

Perorsaasoq ataaseq

Meeqqerisunut perorsaanunullu ikiorti ataaseq

Ikiorti ataaseq.

Ilinniartut suliffinnik misiliisut ikorfartortillu sulisut amerlassusissaattut aalajangersarneqartunut naatsorsuunneqanngillat.

Paaqqinnittarfiup ammanerata nalaani meeqqaanut ukioqatigiikkuutaanut ataatsinut tamatigut atorfillit marluusassapput, tamatigullu paaqqinnittarfimmi ikinnerpaamik perorsaanermik ilinniarsimasooq ataaseq.

Paaqqinnittarfik pisariaqartinneqartunik igaffimmi eqqiaanermilu sulisoqassaaq.

Kommunalbestyrelsi tamanna najoqqutaralugu paaqqinnittarfiit ataasiakkaat sulisussaasa amerlassusissaannik aalajangersaassaaq.

### **Ulluunerani paaqqinnittarfiit kommunimit pigineqanngitsut**

Ulluunerani paaqqinnittarfiit imminnut ingerlattut kommunalbestyrelsimit akuersissutigineqassapput.

Paaqqinnittarfiit imminnut ingerlattut kaajallaasitami matumani aalajangersakkat malittarissavaat.

Kommunalbestyrelsi ulluunerani paaqqinnittarfimmi imminnut ingerlattunik isumaqatigiissuteqarsinnaavoq.

Kommunalbestyrelsi ulluunerani paaqqinnittarfimmi imminnut ingerlattunut aningaasatigut tapiissuteqarpat, isumaqatigiissummi qulakkeerneqassaaq,

- tapiissutit kommunit ulluunerani paaqqinnittarfiutaannut tapiissutinut naapertuuttunit amerlanerussanngitsut,
- angajoqqaat akiliutaat kommunip ulluunerani paaqqinnittarfiutaanni akigitinneqartunit imatorsuaq nikingassuteqassanngitsut,
- tapiissutit pigisat nalillit pilersinnissaannut ingerlatinneqassanngitsut,
- kommunit ulluunerani paaqqinnittarfiutaannut najoqqutassiat maleruarneqassasut,
- aalajangersakkat kommunalbestyrelsimit akuersissutigineqartut naapertorlugit meeqqat paaqqutarineqartussatut tiguneqartassasut.

Ulluunerani paaqqinnittarfimmi kommunimit pigineqanngitsunut aammalu ingerlatsinissaq pillugu kommunimik isumaqatigiissuteqarsimanngitsunut ingerlatsinermut tapiissuteqartoqarsinnaanngilaq.

### **Ulluunerani paaqqinninnerit kommunimit aallartinneqartut**

Ulluunerani paaqqinninnerit kommunalbestyrelsip akuersissuteqarneratigut namminerisamik angerlarsimaffinni pilersinneqarsinnaapput.

Ulluunerani paaqqinniffiit amerlanerpaamik arfinilinnik inissaqarsinnaapput angerlarsimaffimmi namminermit meeqqat 14-it inorlugit ukiullit ilanngullugit.

Meeqqat ukioqanngitsuniit marlunnut ukiullit ulluunerani paaqqinniffimmi inissanik marlunnik pissarsissapput.

Ulluunerani paaqqinniffik annerpaamik sap. akunneranut nal. akunnerini 45-ni ammasarsinnaavoq. Ulluunerani paaqqinnittartut 21-nik ukioqalereersimassapput, ulluuneranilu paaqqinniffimmut aki-sussaassuseq inunnut 18-it inorlugit ukiulinnut suliaassanngortinneqassanngilaq.

Kommunalbestyrelsip ulluunerani paaqqinniffiup nakkutigineqarnissaa ilitsersuunneqarnissaalu isumagissavai.

Kommunalbestyrelsip ulluunerani paaqqinninnerup kommunimit aallartinneqartup susassai allat pillugit erseqqinnerusunik malittarisassat aalajangersassavai.

### **Namminersuutigalugu ulluunerani paaqqinnineq**

Ulluunerani paaqqinninnerit kommunimit aallartinneqartut pillugit aalajangersakkat siuliini taaneqartut namminersuutigalugu ulluunerani paaqqinninnermut aammattaq atuupput.

Kommunalbestyrelsip ulluunerani paaqqinniffinnut kommunimit aallartinneqartunut kommunip aalajangersagaasa namminersuutigalugu ulluunerani ulloq naallugu paaqqinninnermut ullulluunniit affaanut paaqqinninnermut atuuttussanngorlugit akuersissutigisinnaavai.

### **Meeqqat paaqqutarineqartussanngorlugit tiguneqartarnerat**

Kommunalbestyrelsip meeqqerivinnut inissiisartutut ataatsimiititaliaq ukunanga inuttaqartoq pilersissavaa

- ulluunerani paaqqinnittarfinni kommunimit pigineqartuni ulluunerani paaqqinnittarfimmi sulisoq ataaseq sulisut perorsaanermik ilinniarsimasut (taakkununga ilanngullugit meeqqerisunut perorsaasunullu ikiortit) taakkunanga taakkualu akornanni qinerneqartoq.
- ulluunerani paaqqinnittarfinni kommunimit pigineqartuni siulersuisuni angajoqqaanut sinniisissaq angajoqqaanit taakkualu akornannit qinerneqartoq.
- ilaasortat marluk, isumaginninnermut ataatsimiititaliamit toqqakkat, taakkunangalu ataaseq isumaginninnermut ataatsimiititaliami ilaasortaassaaq.
- Ulluunerani paaqqinnittarfinnut kommunimit pigineqanngitsunut siulersuisuni angajoqqaanut sinniisissaq ataaseq, angajoqqaanit taakkualu akornannit qinerneqartoq, taamaattorli taamaallaat ulluunerani paaqqinnittarfinnit meeqqerivinnut inissiisartutut ataatsimiititaliap meeqqanut inissinneqarfissanngorlugit siunnersuutigisaannit.

Meeqqerivinnut inissiisartutut ataatsimiititaliap ulluunerani paaqqinnittarfinnut kommunimit pigineqartunut, ulluunerani paaqqinninnernut kommunimit aallartinneqartunut meeqqat inissinneqarnissaat suliaassaraa ulluuneranilu paaqqinnittarfiit kommunimit pigineqanngitsut meeqqat inissinneqarnissaannik isumaqatigiissuteqarsimasut meeqqerivinnut inissiisartutut ataatsimiititaliamit isumagineqassallutik.

Meeqqerivinnut inissiisartutut ataatsimiititaliap ulluunerani paaqqinnittarfimmi imaluunniit ulluunerani paaqqinninnerni kommunimit aallartinneqartuni inissaqarpat meeqqat utaqqisut allattorsimaffiata akornanniittut eqqarsaatigisassat makkua tunngavigalugit ulluunerani paaqqinnittarfimmut/ulluunerani paaqqinninnermut inissinneqarnissaminnut ukioqalersimasut toqqarneqarnissaat isumagissavaa, tassami immikkoortumi A-miittut B-miittullu immikkoortunit kinguliini taaneqartunit siullinneqartussaammata, pilersuisut atugaasa qanoq issusii apeqqutaatinnagit.

- A. Meeqqat, isumaginninnermut ataatsimiititaliamit pissutsit immikkut ittuunerat pissutigalugu inassutigineqartut.
- B. Meeqqat, ukioqqortusinertik pissutigalugu ulluunerani paaqqinnittarfimmit ulluunerani paaqqinninnernut allanut nuunneqartussat.

- C. Meeqqat, ingerlatsinermut isumaqatigiissutit kommunalbestyrelsimit akuersissutigineqartut naapertorlugit inissinneqartut, pissutigalugu meeqqat taakkua tamarmik iluminni tulleriarineq malittarissammasuk.
- D. Meeqqat, pilersuisunit kisimiittunit suliffeqartunit ilinniagaqartunilluunniit meerarineqartut.
- E. Meeqqat, pilersuisunit marluullutik suliffeqartunit ilinniagaqartunilluunniit meerarineqartut.
- F. Meeqqat, pilersuisunit taamaallaat aappaa suliffeqartumit ilinniagaqartumilluunniit meerarineqartut.
- G. Allat.

Meeqqat toqqarneqarnissaanni meeqqerivinnut inissiisartutut ataatsimiititaliap paaqqinnittarfinni ataasiakkaani meeqqat ukiuisa aammalu nivarsiaranaanerisa nukappiaranaanerisalu naligiikannersumik agguataarneqarnerat taamaaginnartinniassavaat.

Meeqperivinnut inissiisartutut ataatsimiititaliap paaqqinnittarfiullu imaluunniit angajoqqaat akornanni isumaqatigiinngissuteqartoqartillugu apeqqutit susassaqartunit tamaneersut inunnik isumaginninnermi ataatsimiititaliamut aalajangiiffigisassanngorlugit saqqummiunneqarsinnaapput.

Meeqperivinnut inissiisartutut ataatsimiititaliap ilaasortai, kiisalu allat ataatsimiititaliap ataatsimiinnerini peqataasussat pisunut suliaminnut atatillugu ilisimalikkaminnut nipangersimasussaataapput.

Meeqperivinnut inissiisartutut ataatsimiititaliap aalajangiineri inunnik isumaginninnermi ataatsimiititaliamut aalajangersakkat atuuttut naapertorlugit naammagittaalliorfiusinnaasumut naammagittalliutigineqarsinnaapput.

## IMMIKKOORTOQ 2

Ulluunerani paaqqinnittarfiit **nakkutilliisunik misissuisoqannngitsut**, tassalu imaappoq sulisut meeqqat takkuttarnerisa nakkutiginnissaannut, nalunaarutigineqannngitsumik takkutinngitsoortoqartillugu angajoqqaanik ilisimatitsinissamut pisussaataannngitsut, taamaattorli meeqqat inuusuttuaqqallu paaqqinnittarfiinnerani nakkutilliisunik misissuisullit.

Ulluunerani paaqqinnittarfiit **nakkutilliisunik misissuisoqannngitsut** meeqqanut 7-iniit 17-inik ukiulinnut tunngavoq.

Ulluunerani paaqqinnittarfiit **nakkutilliisunik misissuisoqannngitsut** taaguuteqarput: Fritidsklubbit imaluunniit inuusuttut sukisaarsaartarfii.

Imm. 2.

### Assigiissarinerit najoqqutarineqartussat

Init sammisaqartitsiviit annertussusissaat atorineqarnissamittut siunertaannut naleqqussarneqassapput.

Paaqqinnittarfik inissat 15-inngorneri tamaasa ataatsimik anartarfeqassaaq, taakkunannga inissat 40-kkuutaarlugit anartarfik ataaseq issiavinnik kaassuartakkanik atuisunit atorineqarsinnaassaaq.

Anartarfiit ineeqqani matulinni inissisimassapput.

Anartarfiit ininit sammisaqartitsivinniit ininillu sullivinniit toqqaannartumik iserfigineqartariaqanngillat.

Majuartarfeqarfinni qummukarissat ammukarissallu isumannaallisarneqarsimassaput, pingaartunik matunik parnaarneqarsinnaasunik.

Aneerasaartarfinni assigisaannilu ungaluusat 1,2 m-isut portussuseqarnissaat qulakkeerneqassaaq, aammalu imatut ilusiligaassallutik meeqqat qamiterutinut taakkualunniit akornannut qallorsinnaajunnaarlugit.

Inini igalaaqanngitsuni matut matuersaat atornagu ammarneqarsinnaassapput.

Paaqqinnittarfik imatut aaqqissuunneqassaaq innarluutillit immikkut suliniuteqarfigineqanngikka-luarlutik tiguneqarsinnaasunngorlugit.

Imm. 3.

### **Aqutsisut ingerlatsinerlu**

Paaqqinnittarfik ileqqoreqqusaqaassaaq kommunalbestyrelsimit akuersissutigineqartunik.

Ileqqoreqqusani paaqqinnittarfiup siunertai, inissatut akuersissutigineqartut amerlassusiat, aammalu ukioqatigiikkuutaat sorliit tiguneqassanersut allassimassapput, taamatuttaarlu ileqqoreqqusani taku-neqarsinnaassalluni meeqqat/inuusuttuaqqallu inissinneqartarnerat qanoq ingerlasarnera soq.

Paaqqinnittarfik amerlanerpaamik 200-nik inissaqarsinnaavoq.

### **Sulisut amerlassusissaattut aalajangersarneqartut**

Paaqqinnittarfik suliamut tunngassutilimmik ilinniagaqarsimasumik pisortaqaassaaq.

Paaqqinnittarfik inissanut 15-inut tamanut ataatsimik atorfilittaqaassaaq.

Ilinniartut suliffinnik misiliisut ikorfartortillu sulisut amerlassusissaattut aalajangersarneqartunut naatsorsuunneqarajunngillat.

## **IMMIKKOORTOQ 3 Pissutsit tamanut tunngasut**

Imm. 1

### **Avatangiisinut tunngasut**

Ulluunerani paaqqinnittarfinnut tamanut atuuppoq taakkua nunap ilaanut, sammisaqartinneqartussat nittarsaassisussallu periarfissaannut, inissinneqassasut atuisussat navianartorsiorsinnaajunnaarsillu-git.

Ulluunerani paaqqinnittarfiit pinnguarterfiillu nunap ilai innaallagissap sakkortuup aqputaanik ator-tulersuiffiusimasut aqqusaarlugit inissinneqassanngillat.

Ulluunerani paaqqinnittarfiit suliffeqarfiup nipiliortitsisup, pujoralatsitsisup aammalu silaannarmik mingutsitsisup qanittuani inissinneqassanngillat.

Ulluunerani paaqqinnittarfinnik pinnguarterfinnillu inissiinermi eqqaamiorisat eqqarsaatigineqas-sapput, taamaalillutik taakkua ulluunerani paaqqinnittarfimmi pinnguarterfimmilu pisoqarneranit pisariaqanngitsumik akornusersorneqassanngimmata.

Ulluunerani paaqqinnittarfiit pinnguarterfiillu sananeqarneranni atorussat peqqinnissakkut nalune-qanngitsumik ulorianaateqarsinnaasumik kinguneqarsinnaasut atorneqassanngillat.

Imm. 2

### **Akuersissuteqarneq**

Ulluunerani paaqqinnittarfiit tamarmik qatserisartoqarnikkut oqartussaasunit, peqqinnissakkut oqartussaasunit suliffinnillu nakkutilliisoqarfimmit akuersissutigineqassapput.

Kommunalbestyrelsip illuutit akuersissutigissavai oqartussaasullu piumasaqaatai naammassineqarsimanersut nakkutigissallugit.

Tassunga ilanngullugu kommunalbestyrelsip ulluunerani paaqqinnittarfiit kommunimit pigineqanngitsut akuersissutigissavai aammalu najoqqutassiat makkua pilersitsineq, atortulersuineq, aqutsineq ingerlatsinerlu eqqarsaatigalugit maleruarneqarnersut nakkutigissallugu.

Ulluunerani paaqqinnittarfinnut kommuninit pigineqartunut oqartussaassutsimik akuersissutit tamarmik ileqqoreqqusat akuersissutigineqartut tamaasa ilanngullugit Isumaginninnermi Pisortaqarfimmut ulluunerani paaqqinnittarfittut atulersitsinerup akuersissutigineqartussanngorlugit nassiunneqassapput.

### Imm. 3

#### **Immikkut akuersissuteqarnerit**

Ulluunerani paaqqinnittarfinnut tunngatillugu immikkut akuersissuteqarnissamik qinnuteqaatit Isumaginninnermi Pisortaqarfimmut allaganngorlugit qinnuteqaatigineqassapput peqqussummi kaajallaasitamiluunniit allatut allassimasoqanngippat.

Immikkut akuersissuteqarnerit allaganngorlugit nalunaarutigineqassapput kingumoortumillu atuutilersussatut tunniunneqarsinnaanatik.

### Imm. 4

#### **Sanaartornermut tapiissutit**

Ulluunerani paaqqinnittarfinnik sanaartornermut tapiissutit kommunip isumaginninnermi sanaartukkanut pilersaarutaasa nassiunneqarnerannut atatillugu qinnuteqaatigineqassapput.

Sanaartornermut tapiissutit taakkua pillugit aalajangersakkat atuuttut naapertorlugit tunniunnteqartarput.

Kommuni, suliassatut pilersaarut Isumaginninnermi Pisortaqarfimmit akuersissutigineqarpat, aammalu sanaartornermut tapiissutit aningaasaliissutigineqarpata, sanaartornermut aningaasaliissutit aallartitsivigineqarnissaat/atugassanngortinneqarnissaat pillugit qinnuteqassaaq. Sanaartornerit aallartinneqassanngillat Isumaginninnermi Pisortaqarfimmit allakkatigut akuersissut tiguneqareersimattinnagu.

Ulluunerani paaqqinnittarfinnut kommuninit pilersinneqartunut, pigineqartunut ingerlanneqartunullu taamaallaat sanaartornermi tapiissuteqartoqarsinnaavoq.